



## جاپتن مفتي نكري قهغ

قوله تعالى:

فَسَأَلُوا أَهْلَ الذِّكْرِ إِنْ كُنْتُمْ لَا تَعْلَمُونَ

السلام عليكم ورحمة الله وبركاته

### Soalan :

Tuan; Dari Abu Umamah Rasulullah ﷺ bersabda, “Barang siapa berjalan menuju berjamaah solat wajib, maka dia seperti berhaji. Dan barang siapa berjalan menuju solat tatawwu’ (sunat) maka dia seperti berumrah yang nafilah (istilah lain sunnah)”. (Hasan Sahih al Jami’ No. 6556).

Dalam hadis lain Rasulullah ﷺ bersabda ; “Barang siapa keluar dari rumahnya dalam keadaan sudah bersuci untuk solat fardhu maka pahalanya seperti pahala orang haji yang berihram, dan barang siapa keluar sunat dhuha dia tidak bermaksud kecuali itu, maka pahalanya seperti pahala orang yang berumrah. Dan solat sesudah solat yang tidak ada perbuatan sia-sia di antara keduanya ditulis di kitab ‘illiyyin” (Sahih Sunan Abu Daud. No 522; Sahih al Jami’ No 6228).

Betulkah solat Dhuha di masjid, pahala seperti umrah?

وعليكم السلام ورحمة الله وبركاته

### Jawapan :

Alhamdulillah, bersyukur kita ke hadrat Allah ﷻ, selawat dan salam atas Nabi besar Junjungan kita Muhammad ﷺ beserta keluarga dan sahabatnya ﷺ, dan mereka-mereka yang mengikut

segala sunnah Nabi Muhammad ﷺ sehingga ke hari kiamat. Terima kasih kepada saudara, di atas soalan yang telah diajukan kepada kami.

Ya betul dan tepat sekali. Apabila seseorang itu melaksanakannya bermula dengan solat berjamaah subuh di masjid dan kemudian berzikir sehingga terbit matahari dan seterusnya menunaikan solat dhuha. Hadis berikut menjelaskannya :

عَنْ أَنَسِ بْنِ مَالِكٍ قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ مَنْ صَلَّى الْغَدَاةَ فِي جَمَاعَةٍ ثُمَّ قَعَدَ يَذْكُرُ اللَّهَ حَتَّى تَطْلُعَ الشَّمْسُ ثُمَّ صَلَّى رَكْعَتَيْنِ كَانَتْ لَهُ كَأَجْرِ حَجَّةٍ وَعُمْرَةٍ قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ تَامَّةً تَامَّةً

Dari Anas bin Malik berkata, sabda Rasulullah ﷺ : *“Barang siapa yang solat subuh berjamaah kemudian duduk berzikir sampai matahari terbit kemudian diikuti dengan solat dua rakaat, maka dia mendapatkan pahala seperti pahala haji dan umrah.”* dia (Anas) berkata, Rasulullah saw bersabda: *“Sempurna, sempurna, sempurna.”*

(Riwayat al Imam at-Tirmizi No: 535) Status: Hadis Hasan

Ganjaran pahala berganda sentiasa disediakan kepada setiap Muslim yang menunaikan solat berjamaah khususnya di masjid. Oleh itu, barang siapa yang solat subuh berjamaah kemudian duduk berzikir (sama ada zikir, membaca al-Quran, mendengar kuliah dan lain-lain) sampai matahari terbit kemudian diikuti dengan solat dua rakaat (solat Dhuha), maka dia akan mendapatkan pahala seperti pahala haji dan umrah.

وَاللَّهُ أَعْلَمُ بِالصَّوَابِ وَإِلَيْهِ مَرْجِعُ وَالْمَأْبُ

Rujukan :

1. al Imam at –Tirmizi: Jamia’ al Sahih.
2. Mufti Pahang: Bicara Fajar Masjid al Hikmah, Rompin.